

Mladi odlučno rekli „da!“ različitosti i „ne!“ diskriminaciji – izabrana bh. reprezentacija za svjetsko debatno natjecanje

U periodu 23.02. – 25.02.2018. u Behram-begovoj medresi u Tuzli je organizirana Smotra srednjoškolaca iz BiH „Jednaki u različitosti-ne diskriminaciji!“ – XXI Državno debatno natjecanje.

Od STUDOMAT - 27.02.2018.



Na smotri su učestvovali srednjoškolci i srednjoškolski profesori iz cijele BiH. Argumente protiv diskriminacije su razmijenili mladi iz: Banja Luke, Bihaća, Brčkog, Breze, Čelića, Donjeg Vakufa, Drvara, Gračanice, Gradačca, Istočnog Sarajeva, Kaknja, Kladnja, Konjica, Mostara, Novog Grada, Prijedora, Sarajeva, Srebrenika, Srpc, Teslića, Tešnja, Tinje, Travnika, Tuzle, Usore, Visokog, Zenice, Zvornika i Živinica.

Teme Smotre, bile su:

- U bh. školama se njeguje zajedništvo različitosti (da/ne)
- Izuzeće nadarene, darovite i talentirane djece od jednakog postupanja je opravdano (da/ne)
- Mediji u BiH potiču diskriminaciju (da/ne)

Debata nikada nije razgovor istomišljenika. Srednjoškolci su svojim debatnim umijećem pokazali da diskriminacija ima mnogo lica i da ona postoji čak i kada nam se čini da je nema. Razlike ne smiju biti temelj za podjelu, nego uvijek moraju biti osnova za kreiranje boljeg i uspješnijeg društva u kojem se dogovorom može sve postići.

Osim navedenih tema za argumentirane rasprave, srednjoškolci su prezentirali i govore o sljedećim temama:

- Pozitivna diskriminacija Roma je opravdana u bh. obrazovnom sistemu
- Sve škole u Bosni i Hercegovini treba da osiguraju uvjete za inkluziju slijepih i slabovidnih učenika
- Jednaki uvjeti za upis u škole i fakultete mogu dovesti do diskriminacije
- Jednaki, ali odvojeni – jeste diskriminacija

Mladi su kroz individualne govore pokazali značajan stupanj kritičkog promišljanja i da mogu samostalno analizirati različite oblike diskriminacije koji se mogu pojaviti u društvu i jasno iznijeti svoj stav o problemu bez straha od osude, ali i bez vrijeđanja drugih i drugačijih.

XXI Državno debatno takmičenje je bilo ujedno prilika za **izbor reprezentacije BiH** koja će predstavljati BiH na Svjetskom debatnom natjecanju u Zagrebu, 2018.

Tri prvo plasirane ekipe su:

1. **mjesto – Gazi Husrev-begova medresa, Sarajevo**
2. **mjesto – SŠC „Istočna Ilidža“, Istočno Sarajevo**
3. **mjesto – Gimnazija Banja Luka**

Najbolji pojedinačni govornici su bili:

1. **mjesto – Amina Kahrman, Gazi Husrev-begova medresa, Sarajevo**
2. **mjesto – Aleksandar Bakmaz, Gimnazija Banja Luka**
3. **mjesto – Marko Štaka, SŠC „Istočna Ilidža“, Istočno Sarajevo**

Najbolji srednjoškolci u kategoriji besjedištva su:

1. **mjesto – Aleksandar Bakmaz, Gimnazija Banja Luka**
2. **mjesto – Alija Mevkić, Behram-begova medresa, Tuzla**
3. **mjesto – Amina Kahrman, Gazi Husrev-begova medresa, Sarajevo**

Zajednički zaključak svih učesnika natjecanja jeste da je, nažalost, diskriminacija sveprisutna u bh. društvu i da rješenje leži u zajedničkim naporima da bh. društvo bude oslobođeno bilo kakvih stereotipa i predrasuda. Razlike između lokalnih zajednica, gradova, kantona i entiteta trebaju biti temelj za radost življenja u različitosti, a ne nikako kamen spoticanja.

(STUDOMAT.ba)



STUDOMAT

<http://www.studomat.ba>

STUDOMAT je najveća internet zajednica studenata i mladih u regionu osnovana 2012. godine, namijenjena studentima i mladima u potrazi za informacijama o studiju i dodatnoj edukaciji, stipendijama, studentskim poslovima, smještaju i ostalim temama koje su interesantne studentima i mladima.

